

DUNIA PENGETAHUAN

ILMU MAGNETISM

Suatu pertanyaan akan timbul, iaitu tidakkah

dan ilmu magnetism.

“ilmu magnetism: itu bertentangan dengan ajaran *al-Qur’ān* seperti yang terkandung di dalam ayat 34, surah Luqman, yang berbunyi: “... *wa mā tadrī nafsūn mādhā tuksibu ghadān*. (...dan tidak ada orang yang mengetahui apa yang ia akan kerjakan esok?)

Bagi menjawabnya, sayugia diketahui, bahawa ilmu-ilmu ghaib yang ada di muka bumi ini, amatlah banyak jenisnya. Tiap-tiap satunya mempunyai jalan dan cara yang tersendiri untuk dipelajari atau digunakan. Nama dan rupanya berjenis-jenis pula, tetapi semuanya itu tidak terkeluar dari tiga dasar:

- 1) Sihat badan
- 2) Teguh dan tetap kemahanan.
- 3) Bersih dan kuat roh

Oleh kerana ilmu magnetism halus dan tersembunyi tempat pengambilannya serta mempunyai tiga dasar itu, maka ada yang memasukkan dalam bahagian ilmu ghaib. Demikian pula cabang dari ilmu magnetism itu, seperti: ilmu mengirim fikiran, ilmu menghadirkan roh, ilmu mengubati orang dengan kekuatan kemahanan, ilmu menidurkan orang, dan sebagainya itu, dinamakan ilmu ghaib.

Supaya boleh meletakkan sesuatu atau pada tempatnya serta mengetahui hukum masing-masing, memadailah rasanya, jika diterangkan di sini dua jenis ilmu iaitu “ilmu sihir”

Sihir

Perkataan “sihir” ini ada mempunyai beberapa pengertian:

- 1). Tipu dan khayal-khayal (gambaran-gambaran) yang tidak ada hakikatnya sama sekali, sebagaimana yang dikerjakan oleh kebanyakan tukang songlap.
- 2). Sesuatu yang dihasilkan dengan pertolongan jin syaitan dengan jalan memujanya.
- 3). Tiap-tiap yang halus dan tersembunyi tempat pengambilannya.

Dalam hal sihir ini, banyaklah orang-orang yang memberi pemandangannya. Ada yang mengatakan sihir ini suatu perbuatan yang menyalahi adat (*khawāriq*), ada yang berkata haram dituntut atau dipelajari, dan ada pula yang berkata patut seseorang mempelajarinya supaya terhindar daripada tipu muslihat yang dilakukan oleh ahli-ahli sihir itu.

Sekarang marilah kita periksa pandangan orang-orang

Itu:

Khawāriq

Yang dinamakan “*khawāriq*” itu, ialah kejadian-kejadian yang luar biasa, yang tidak berulang-ulang. Kalau sihir juga kita katakan masuk bilangan *khawāriq*, tentulah kejadiannya tidak berulang-ulang, pada hal buktinya adalah sebaliknya, kerana boleh dipelajari oleh tiap-tiap orang. Oleh sebab itu, jelaslah sihir tidak termasuk dalam

bilangan *khawāriq*, tetapi ialah salah satu ilmu seperti ilmu-ilmu yang lain.

Tentang haramnya:

Orang yang mengatakan sihir itu haram, adalah bersesuaian dengan ajaran Islam, kerana ilmu sihir yang ada di tanah Arab, India, Tanah Melayu dan Indonesia, adalah rata-rata mempunyai sifat-sifat yang membawa kepada kufur dan syirik.

Tentang ini Ibnu Khaldun menulis di dalam Muqadimahnya:

“....dan amalan sihir itu semuanya, tidak lain, melainkan dengan cara menghadapkan diri kepada jalan peredaran bulan dan bintang, dan kepada bintang-bintang dan alam-alam yang tinggi, dan kepada syaitan-syaitan dengan berbagai-bagai cara penghormatan, ibadat merendah dan menghinakan diri. Maka yang demikian itu, ialah menghadapkan diri kepada yang lain dari Allah, dan sujud kepada selain dari Allah, sedang menghadapkan diri kepada selain dari Allah itu, kufur.”

Selain daripada cara-caranya yang tidak baik itu, akibatnya atau hasilnya pun kebanyakan tidak baik, kerapkali membawa kepada permusuhan antara satu dengan lain, mencerai-beraikan antara suami dengan isterinya, membinasakan orang-orang dan lain-lain kejadian yang buruk, seperti menjadikan gila dan merosakkan fikiran seseorang.

Perkara yang sangat digemari oleh ahli-ahli sihir dalam pekerjaannya, ialah menawan hati orang-orang perempuan supaya suka kepadanya atau kepada seseorang yang meminta tolong kepadanya, dengan tidak dihiraukan adakah perempuan itu isteri orang atau tidak.

Kebaikan bagi masyarakat hidup kita, boleh dikatakan tidak ada, kerana tidak ada orang bodoh yang boleh menjadi pandai dengan sihir, dan tidak ada orang miskin yang boleh menjadi kaya dengan sihir.

Oleh kerana itu semua, maka Nabi ada bersabda seperti yang diriwayatkan oleh Abu Mūsa Al-Ash‘arī:

lā yadħulu al-jannata mu'minu himar wā la mu'minu bi siħr; wā la qāta'a rahmi (tidak akan masuk syurga: orang yang berkekalan meminum arak, dan tidak – akan masuk syurga – orang yang percaya kepada sihir, dan tidak -akan masuk syurga – orang yang memutuskan rahim -perhubungan kaum keluarga) – R. Ibnu Hibbān dalam Ḫażeb.

Tentang halalnya:

Orang-orang yang berpendapat bahawa sihir itu halal, ialah memandang bahawa dia sebagai suatu ilmu, sedang ilmu apa sahaja disuruh oleh agama kita menuntutnya. Jadi, katanya, sihir juga mesti kita pelajari, supaya boleh kita terhindar dari tipu daya ahli sihir.

Pendapat yang seperti itu mustahak kita kupas.

Sihir sebagai suatu ilmu itu, kita akui. Agama menyuruh kita menuntut ilmu, itu juga kita akui.

Tetapi, adakah agama kita membenarkan kita mengerjakan perbuatan kufur atau syirik? Sudah tentu tidak akan ada orang Islam yang mengatakan boleh. Jika demikian, patutkah dibolehkan orang mempelajari ilmu sihir, pada hal di dalamnya penuh dengan syirik, sebagaimana yang dikatakan oleh Ibnu Khaldun itu? Bukankah orang-orang yang mempelajari ilmu sihir itu, bermakna telah melakukan perbuatan syirik?

Dengan itu semua, tetaplah sihir itu, tidak boleh dipelajari dan diamalkan. Bukan sedikit jalan halal yang Allah Azza Wa Jalla telah kurniakan kepada kita, tetapi kitalah yang jarang mengetahuinya.

Dengan memerhatikan sedikit dari keterangan yang di bawah ini, dapatlah diketahui, bahawa supaya manusia boleh terselamat dari tipu muslihat ahli sihir itu, tidak mustahak kita mempelajari ilmu sihir yang telah diharamkan oleh Allah.

Magnetisme

“Magnet” ertinya: besi berani.

“Magnetism”, ertinya: kekuatan besi berani, atau kekuatan ghaib (tersembunyi).

Menurut pemeriksaan ahli ilmu alam, ada dikatakan, bahawa ilmu ini penuh dengan kekuatan ghaib, sehingga tumbuh-tumbuhan, binatang-binatang, dan manusia pun ada mempunyai kekuatan atau magnetism itu.

Dalam tiap-tiap urat halus yang ada dalam otak kita, pada segala urat yang ada di dalam badan dan pada tiap-tiap titisan darah kita – *al-hāsil* di seluruh badan manusia -ada tersimpan magnetism.

Magnetism inilah yang jadi salah satu daripada alat-alat yang menyebabkan manusia hidup. Kalau tidak ada kekuatan itu, manusia tidak akan hidup, sebagaimana, kalau tidak ada darah dalam badannya, ia akan mati.

Timbulnya magnetism dalam badan manusia itu, ialah kerana bekerjanya atau bergeraknya *electricity* kehidupan yang ada pada manusia.

Maka bagi membangunkan dan mengumpulkan *electricity* kehidupan, supaya boleh menjadi satu kekuatan magnetism yang berpengaruh, telah diadakan orang beberapa jenis pelajaran. Pelajaran-pelajaran yang diatur itu, hampir semuanya berupa gerakan badan, seperti cara bernafas, cara duduk, cara menyatukan fikiran ke satu arah dan lain-lainnya.

Di antara beberapa cara itu, boleh kita tetapkan, tidak ada yang sama sifat-sifatnya dengan pelajaran sihir, dan tidak ada yang akan membawa kepada kufur atau syirik, kerana di dalam mempelajarinya tidak ada kita tujukan kepercayaan kita atau sembahannya kepada sesuatu makhluk atau syaitan.

Semua cara dan aturan pelajarannya itu, boleh diterima oleh akal kita.

Oleh kerana itu, “ilmu magnetism” ini, serta

cabang-cabangnya sebagaimana yang telah disebutkan di atas, tidak boleh dikatakan sama dengan sihir yang telah diharamkan itu. Adalah ia sebagai satu ilmu yang biasa, yang halal bagi manusia.

Sekadar ini, memadailah rasanya, bagi mengetahui dasar-dasar ilmu magnetism.

Dengan keterangan-keterangan yang ringkas itu, dapatlah kita bezakan antara ilmu sihir dengan magnetism.

Sekarang, oleh sebab ilmu magnetism ini jadi asal bagi pertanyaan-pertanyaan tadi, maka mustahak kita mengetahui pekerjaan atau hasil dari ilmu ini.

Bagi orang yang sudah mempunyai ilmu ini, dengan menurut beberapa syaratnya lagi, boleh ia hasilkan maksud-maksudnya, seperti menyembuhkan sebahagian penyakit dengan tidak pakai ubat, memanggil orang dengan perantaraan kemahuannya, menidurkan orang dan menyuruhnya supaya menceritakan hal-halnya, dan boleh juga ia mengetahui hal-hal yang akan datang, walaupun tidak semuanya akan betul, dan banyak lagi yang pelik-pelik yang boleh dilakukan dengan perantaraan ilmu ini.

Kalau dengan ilmu magnetism atau dengan lain-lain jalan, seseorang boleh mengetahui yang ghaib dan boleh mantapkan apa yang ia akan usahakan esok, tidaklah dapat dikatakan berlawanan dengan ayat Quran yang tertera di atas (yang bermaksud: Tidak ada orang yang mengetahui apa yang ia akan kerjakan esok), kerana perkara “ghaib” yang boleh diketahui oleh magnetism itu, tidak sama dengan “ghaib” yang dimaksudkan oleh ayat tersebut.

Bagi menjelaskan itu, baiklah kita ketahui, bahawa yang dinamakan “ghaib” itu, ada dua jenis. Yang pertama

-sambung ke muka 47